


Vischnaunca da Medel/Lucmagn



**Statuts
dall'Ovra electrica Medel**

I. Definiziuns generalas

Art. 1 Fuorma giuridica

L'OEM (Ovra electrica Medel) ei in menaschi dalla vischnaunca Medel/Lucmagn cun sedia a Medel/Lucmagn.

L'OEM posseda in'atgna facultad e meina in agen quen.

Art. 2 Intent

L'OEM proveda consumentas e consuments finals (tenercasas privats, menaschis da professiun, da survetsch e d'industria ed il maun public) sin igl intschess dalla vischnaunca da Medel/Lucmagn sufficientamein, regularme in e segir, a moda nundiscriminonta e suenter principis economics da fiera cun energia electrica.

L'OEM baghegia e meina segirs e productivs stabiliments e reits pil provediment d'electricidad. Ella garantescha, cun observaziun dil stan dalla tecnica, lur manteniment, renovaziun ed extensiun.

L'OEM risguarda il dretg superiur ed exequescha en siu camp d'actividad ils pensums surdai alla vischnaunca entras la confederaziun ed il cantun.

L'OEM sa entrar en cooperaziuns cun autras interpresas d'energia.

L'OEM ha la cumpetenza da surdar ni d'incumbensar tiarzas personas qualificadas cun la liquidaziun da tuttas lavurs tecnicas, commercialas ed administrativas che cumpeglian lur camp d'actividad.

Quella incumbensa cuntegn era il dretg d'administraziun dall'energia da participaziun e da concessiun.

L'OEM sa, tier immobilias habitadas permanent, sustener finanzialme in mesiras per spargnar energia.

Art. 3 Finanziaziun

L'OEM finanziescha sesezza entras il gudogn ord la vendita d'energia ni d'alters gudogns ord l'administraziun dall'interpresa.

Il pagament da gudogn alla vischnaunca astga buca restrenscher la productividad economica dall'interpresa. L'interpresa astga far reservas per investiziuns necessarias.

Igl onn da gestiun ei igl onn calendar.

II. Organisaziun

Art. 4 Organs

Il's organs dall'OEM ein:

1. La radunonza da vischnaunca
2. La suprastonza communal
3. La cumissiun administrativa
4. Il post da revisiun

1. La radunonza da vischnaunca

Art. 5 La radunonza da vischnaunca

La radunonza da vischnaunca ei igl organ superiur dall'OEM.

Tut las fatschentas che vegnan tractandadas ston vegnir publicadas silmeins 7 dis avon la radunonza egl organ da communicaziun official.

Art. 6 Conclus/votaziun/eligibladad

Per votaziuns ed elecziuns vala la lescha corrispudenta per votaziuns ed elecziuns dalla vischnaunca da Medel/Lucmagn.

Art. 7 Cumpetenzas dalla radunonza da vischnaunca

Alla radunonza da vischnaunca ein resalvadas (tier fatschentas che pertuccan l'OEM) las suandontas cumpetenzas buca delegablas:

- Fixaziun e midada da statuts
- Approbaziun d'impurtonts reglaments, p.ex. cundiziuns generalas per la colligiazion vid la reit electrica (ABN), cundiziuns da colligiazions tecnicas dil gestiunari dalla reit per colligiazions vid reits publicas da provediment cun tensiun bassa (TAB) etc.
- Approbaziun dil quen annual
- Approbaziun dil preventiv
- Approbaziun dil rapport annual
- Fixaziun dils prezis d'energia basond sin las definiziuns legalas e sin las directivas dall'Elcom
- Liquidaziun ni sliagment dall'OEM

2. La cumissiun administrativa

Art. 8 Elecziuns

Il's commembers dalla cumissiun administrativa vegnan elegi entras la suprastonza communal.

Art. 9 Cumposiziun

La cumissiun administrativa secumpona da treis commembers.

La cumissiun administrativa seconstituescha sezza.

In commember dalla suprastonza communal dalla vischnaunca Medel/Lucmagn fa part ex officio alla cumissiun administrativa.

Art. 10 Organisaziun

La cumissiun administrativa tegn sias sesidas aschi savens che las fatschentas currentas pretendan quei. Las radunonzas vegnan menadas dil president dalla cumissiun. Tuttas decisiuns ston vegnir protocolladas.

Art. 11 Cumpetenzza da decider

Decisiuns dalla cumissiun administrativa pretendan la presenza da tut ils commembers. Ei vala il pli absolut dils commembers presents.

Art. 12 Cuoz digl uffeci

Il cuoz digl uffeci dils commembers dalla cumissiun administrativa croda ensemen cun la qualla dils uffecis dalla vischnaunca Medel/Lucmagn. Ina reelecziun ei lubida.

Art. 13 Predeliberaziun cun la suprastonza communal

La cumissiun administrativa ei obligada da suttametter per predeliberaziun alla suprastonza communal ed alla cumissiun da gestiun il quen annual, il preventiv ed il rapport annual. In'approbaziun entras la radunonza da vischnaunca ei pér posterieuramein pusseivla.

Art. 14 Indemnisaziun

L'indemnisaziun dils commembers dalla cumissiun administrativa pertuccont daner da sesida, indemnisaziun da schurnada, indemnisaziun da kilometers e protocol sedrezzan tenor il reglament da salarisaziun dalla vischnaunca da Medel/Lucmagn.

Ulteriuras expensas dils commembers vegnan cumpensadas tenor tariffa d'ura dil reglament da vischnaunca. Ils commembers dalla cumissiun administrativa ein obligai da presentar detagliadamein las expensas.

Las lavurs dil president vegnan indemnisadas cun ina pauschala. Quella vegn fixada dalla cumissiun administrativa. L'indemnisaziun per il diever dil vehichel privat sco era engaschaments anoviars vegnan indemnisai separau tenor reglament da vischnaunca.

Art. 15 Cumpetenzas dalla cumissiun administrativa

- La survigilonza dalla gestiun, oravontut cun l'observaziun dallas leschas, statuts, reglaments e decisiuns dalla radunonza da vischnaunca.

- La cumissiun administrativa representa l'OEM anoviars.
- Garantir ina contabilitad tenor ils principis da contabilitad tenor igl OR.
- Redeger il rapport da gestiun.
- La tscharna e la revocaziun da tiarzas personas, che sustegnan la cumissiun administrativa en lur funcziuns.
- L'introducziun da stumaziuns per dabiens ord quens d'electricitad ed auters dabiens, ch'ei vegni surdai entras l'OEM en incarica da tiarzas personas.
- La cumissiun administrativa decida sur da tut las autras fatschentas dall'OEM, che crodan buca entras la lescha ni entras ils statuts ella cumpetenzza d'in auter organ.

3. Il post da revisiun

Art. 16 Elecziun/pensum/cumpetenzza

Il post da revisiun dall'OEM ei identics cun il post da revisiun dalla vischnaunca da Medel/Lucmagn.

Il post da revisiun ha d'ademplir particularmein ils pensums ch'ei prescrets tenor lescha e da rapportar en scret alla radunonza da vischnaunca.

III. Constataziuns finalas

Art. 17 Entrada en vigur/sligiament

Ils presents statuts van en vigur suenter l'approbaziun dalla radunonza da vischnaunca Medel/Lucmagn, ils 13 da december 2012.

Quels statuts remplazzan ils statuts dall'OEM dils 1 da matg 2008.

Il president

Igl actuar

.....

.....

Per la vischnaunca da Medel/Lucmagn

Il president

Il canzlist

.....

.....